
Aktsemdsvurdering Steinvik 2022



Innhald

Om Steinvik	1
Innhald og grunnlag for rapport.....	1
Metodikk	2
Risikovurdering internt.....	3
Aktsemdsvurdering i leverandørkjeda– Risikovurdering av leverandørar	4
Konklusjon - Tiltak på funn, førebyggjande og overvaking	6
Dokumentet er styregodkjent av:	8

Om Steinvik

Denne rapporten omhandlar konsernet Steinvik. Konsernet består av fleire selskap. Loke Eigedom AS er morselskap i konsernet. Vidare består konsernet av Bru Eigedom AS, Steinvik Fiskefarm AS, Steinvik Fiskefarm Visningscenter AS, Barlindbotn Settefisk AS, Breivika Eigedom AS og Steinvik Rensefisk AS. Rapporten vil ta føre seg aktsemdsvurdering som er gjort på grunnlag av konsernet sine selskap. Denne vurderinga gjeld for perioden 01.01.2022 til 31.12.2022.

Steinvik har verksemd innan store delar av verdikjeda til produksjonen av atlantisk laks og aure. Barlindbotn Settefisk AS er lokalisert i Barlindbotn, nær Steinvik sitt hovudkontor Hopen. Her produserer Steinvik rogn til smolt. Steinvik har også eit nytt høgteknologisk og framtidretta anlegg for produksjon av postsmolt i Svelgen. Her er det også ei avdeling for tilvekst av rensefisk, der det no er produksjon av berggylte. Dette anlegget vert drifta av Steinvik Rensefisk og Barlindbotn Settefisk. Steinvik Fiskefarm AS driv produksjon av matfisk i sjø. Steinvik Fiskefarm har 6 matfisk- konsesjonar, som vert drifta på 9 lokalitetar i Kinn og Askvoll. Produksjonen av matfisk er fordelt på lokalitetane : Hovden, Veiesundet, Klavelandet, Ålovra, Sveholmane, Seljeseth, Steinvik, Kviteskjæret og Hella. Der er målet å produsere rundt 8000 tonn fisk i året. I tillegg har Steinvik Fiskefarm eit Visningscenter med føremål å formidle havbruksnæringa til publikum i Kinn kommune og i områda/kommunane i nærleiken. Konsernet eig også bygningsmassen til dei ulike anlegga, gjennom eigedomsselskapet Breivika Eigendom AS og Bru Eigedom. Dei er dermed eigarar av dei største innsatsfaktorane i verdikjeda, frå smolt til matfisk. Dette gjev dei høvet til sjølve å ha kontroll på berekraftig produksjon i heile verdikjeda og smidig tilpassing til omgjevnadane.

Innhald og grunnlag for rapport


Grunnlaget for rapporten er innføringa av Openheitslova, som vart gjeldande i juli 2023. Steinvik vert omfatta av denne lova. Dette gjer til at konsernet må gjennomføre aktsemdsvurderingar i tråd med OECD sine retningslinjer for fleirnasjonale selskap. Målet er å førebygge menneskerettsbrot og usømelege arbeidstilhøve hjå selskapet, verksemda sine samarbeidspartnarar og nedover i leverandørkjeda. Lova har som føremål å sette eit søkelys på moglege menneskerettsbrot i selskapet sine verdikjeder. Nokon av dei områda i verdikjeda som generelt går att som risikofaktorar er : leverandørkjeda for råvarer til fôr, produksjon av nøter og tauverk samt produksjon og vedlikehald av arbeidsbåtar.



Metodikk

I Steinvik har administrasjonen hatt ansvaret for å utarbeide aktsemdsvurderingar for dei leverandørane selskapet er i kontakt med og har forhandlingar med. Steinvik er også ein del av Salmon Group. Målet med denne organisasjonen er å utnytte effekten av eit bransjesamarbeid, for å løyse felles utfordringar som medlemselskapa har. På denne måten har Steinvik god nytte av nettverket Salmon Group, der eigarane er 57 små og mellomstore oppdrettarar i Norge. Salmon Group har som hovudføremål å oppnå stordriftsføremøner gjennom felles innkjøpsavtalar for selskapa i nettverket. Nettverket har faste tilsette som aktivt jobbar med å ivareta selskapa sine interesser knytt til innkjøp av varer og tenester samt oppfølging av avtalane. Dette fører til auka påverknadskraft og styrke i forhandlingar overfor leverandørane. Slagkrafta vil også bli sterkare i forhandlingar av prisar og tilpassingar av fôr. Dette har direkte ført til utviklinga av : « Salmon Group fôret», som legg vekt på berekraftige råvarer. Gjennom eit slikt nettverk står en sterkare til å stille krav til sosial berekraft bakover i leverandørkjeda. Salmon Group si aktsemdsvurdering vil vere sentral for Steinvik sin del, sidan nettverket forhandlar fram store delar av innsatsfaktorane som går inn i Steinvik sin produksjon. Dei forhandlar fram avtalar rundt fôr, rogn, vaksinar, medikament, gass med meir. Av Steinvik sine kostnader viser diagrammet fordelinga mellom avtalar inngått av Steinvik og Salmon Group. Som ein kan sjå, går ein stor del av transaksjonane gjennom Salmon Group sine avtalar.

Fordeling av kostnader frå avtaler
Salmon Group og Steinvik



Prosess i Steinvik

Proessen for gjennomføring av aktsemdsvurderingar:

1. Kartlegge ansvaret bedrifta har, og plante ansvarlege retningslinjer hjå styret og i organisasjonen.
2. Undersøke og kartlegge faktiske og moglege menneskerettsbrot, i leverandørkjeda og hjå underleverandørar, gjennom risikovurdering.
3. Iverksette tiltak for å forebygge, begrense eller i verste fall stoppe aktivitet som kan føre til menneskerettsbrot.
4. Overvake effekt som dei ulike tiltaka har.



Risikofaktorar

Risikofaktorane vil saman danne eit totalbilete for korleis risikoen til leverandøren er. På denne måten er det summen av risikofaktorar som fører til kva for kategori selskapa kjem i. Dei ulike faktorane er:

- **Næring:** Nokre næringar og leverandørar av tenester, har høge risikofaktorar.
- **Produkt:** Nokon av produkta har særskilt risiko knytt til produksjonsmetode og opphav til råvara.
- **Landrisiko:** Nokre nasjonar har større risikoar for brot på menneskerettar og gode arbeidstilhøve.
- **Bindingstilhøve:** Kor lett tilgjengeleg eit produkt er hjå ein leverandør , spelar inn på om Steinvik Fiskefarm er avhengig av dette produktet.
- **Transaksjonsvolum:** Total omsetnad frå Steinvik til leverandøren
- **Relativt transaksjonsvolum:** Tilhøvet mellom omsetnaden frå Steinvik og leverandøren sin samla omsetnad.

Det er særleg næringsrisiko og landrisiko som dannar grunnlaget for grovsortering av leverandørane. Sidan mange leverandørar høyrer til i same næring, har vi også brukt andre parameter i utveljinga. Dette inkluderer mellom anna risikoar knytt til felles bindingstilhøve, transaksjonsvolum og relativt transaksjonsvolum. Dette kan t.d. gi ein peikepinn på om leverandøren følgjer gjeldande reglar for arbeidstakarar sine rettår, eller ikkje.

Vidare har Steinvik sett på finansielle peikepinnar. Dette inneber mellom anna storleiken på omsetnaden til dei sentrale leverandørane våre. Vi ser på: påverkingskrafta vår, vår binding til leverandørane og tilhøvet mellom omsetnaden frå oss og leverandøren sin totale omsetnad. Med grunnlag i nemnde metode, har ein kome fram til ei liste med leverandørar som har ein potensiell risiko. Etterpå har ein føreteke ei vurdering om nokon av leverandørane skal gjevast ein lågare eller høgare prioritet innbyrdes.

Risikovurdering internt

Steinvik er tredjeparts sertifisert medlem av GLOBAL GAP (GGN) , noko som stiller strenge krav til menneskerettar. Under denne Global GAP sertifiseringa vert det også gjennomført ein GRASP – revisjon. Dette er ein gjennomgang av dei sosiale tilhøva i konsernet. Dette vil fungere som ei ekstern validering av Steinvik. For å finne desse sertifiseringane kan ein sjå på GGN- nummera i Global Gap sin database:

- | | |
|--------------------------------------|---------------|
| - Steinvik Fiskefarm: | 4056186291240 |
| - Steinvik Fiskefarm Visningssenter: | 4063061380739 |
| - Barlindbotn Settefisk | 4050373741112 |

Vi har også ei rutine på at vi ikkje brukar innleigd arbeidskraft, men tilset folk på mellombelse kontraktar. Dei har då dei same rettane som dei andre tilsette. Vidare driftar vi under Norsk Lov, som også gjer til at ein er godt innanfor krav etter aktsemdsvurderingane.



På grunnlag av tredjepart si sertifisering og dei interne prosedyrane selskapet allereie har, ser vi ikkje nokon grunn til å gjennomføre fleire rutinar på dette for intern validering og avdekking av brot i høve til OECD si rettleiing for fleirnasjonale selskap og FN sine menneskerettar.

Aktsemdsvurderingar i leverandørkjeda– Risikovurdering av leverandørar

Steinvik hadde i 2022 nærare 500 leverandørar. I denne gjennomgangen har vi vurdert alle leverandørar med over 500 000 kr i innkjøp. Dette vil seia at alle leverandørar med innkjøp over ca. 1% av omsetnaden til Steinvik i 2022, er inkludert i aktsemdsvurderinga. Dei utgjer totalt 98 leverandørar, som igjen er 95,8 % av konsernet sine leverandørkostnader.

Fase 1

I denne fasen vert leverandørane delt inn i grupper. Grupperingane er faste partnarar, selskap der Salmon Group gjer gjennomgangen, interne selskap eller om dei er prosjektbaserte. Dette fører til at vi sit att med 48 selskap der det vil bli gjort ei nærare vurdering. Dette er selskap vi ser på som faste leverandørar. I denne fasen ser vi nærare på kva for land selskapet har hovudkontor i, og andre geografiske område selskapet er innblanda i, og om dette er verksemd selskapet sjølv har kontroll over eller ulike underleverandørar. Ved å gå igjennom tilhøyrande sektor til leverandør og underleverandørar, får vi ein peikepinn på eventuell kompleksitet i leverandørkjeda og om det kan finnast eventuelle risikoar her. Sidan dei utgjer ein viss storleik av vårt forbruk, er det også naturleg å sjå på korleis desse stiller seg til openheitslova.

Leverandørane til Steinvik er delt inn i desse gruppene :


Tenester : I denne kategorien kjem selskapa som indirekte hjelper til med produksjonen. Dette er leverandørar som ikkje har direkte innsatsfaktorar til produksjonen, men som leverer tenester som transport av fisk, bistand til operasjonar samt vaksinerings av fisk. Dei ibuande risikoane i denne kategorien, er verft leverandøren har brukt til produksjon av båtar samt korleis dei har lagt til rette for bruk av innleigd arbeidskraft.

Produsent : Desse produserer varer som direkte påverkar Steinvik sin produksjon. Dette er enten som leverandør av utstyr til matfisk eller settefisk, samt produksjon av smolt og rensefisk. I denne kategorien kjem fleire av selskapa Salmon Group har gjort aktsemdsvurderingar rundt.

Systemleverandør : I Steinvik sitt tilfelle, er dette leverandørar som er med på tilverkinga og vedlikehald av selskapet sine anlegg på land. Dette er primært anlegga i Svelgen og Barlindbotn.

Forhandlar : Dette er forhandlarar av varer, og som ikkje tilfører verdi til vara. I dette tilfellet er utstyr og bunkring dei største produkta hjå konsernet. Her er det avgrensa kor mykje Steinvik kan påverke forhandlarane våre av varer, gjeve storleiken vår opp i mot dei.

LEVERANDØRGRUPPER



Fase 2

Det neste steget har vore å gjennomføre vurderingar basert på moglege risikofaktorar leverandøren har i leverandørkjeda eller i eiga verksemd. Gjennom vurderinga i fase 2, vert det sett nærare på om selskapet har ein mogleg ibuande risiko som er kjend i enten landet, næringa eller produktporteføljjen selskapet har tilknytning til. Basert på dette, sit vi att med 26 av 49 leverandørar som blir definert i grupper med mogleg risiko basert på faktorar i verksemda eller hjå underleverandørar. Av desse 26 leverandørane, har 18% av dei deler av verksemda i utlandet, og 82% av selskapa er sjølve omfatta av openheitslova.

Fase 3

I fase 3 ser vi nærare på dei ulike leverandørane, for å plassera dei i dei ulike kategoriane og gjennomføre aktsemdsvurderingar av selskapa. Vi kategoriserer dei i tre ulike grader : låg risiko, middels risiko og høg risiko. Grunnlaget for klassifiseringa er:

- Låg risiko er : norske leverandørar med ein tredjepart si sertifisering, eller har utarbeida ein omfattande berekraftrapport etter standardar som GRI- rammeverket , eller rapport i tråd med openheitslova. Også leverandørar av forsikring, pensjon, finans, bank og IT med norske kontor, er selskap som automatisk vil enda opp i denne kategorien.
- Middels risiko er : selskap som er norske, men som har lite tilgjengeleg informasjon og som er knytt til ein av dei ulike risikokategoriane.
- Høg risiko er : selskap som vil bli gjort nærare vurderingar av, og som har verksemd i utlandet og i land med mogleg risiko etter «[CSR Risk Check](#)» indeks. Dette er ei nederlandsk plattform som brukar 3375 datakjelder for å danne ein score basert på ESG-faktorar for ulike land. Selskap som heller ikkje har tilstrekkeleg offentleg informasjon, vil også bli gjort ein nærare gjennomgang av.



Faktorar som er sentrale, er om verksemda har offentleg informasjon om moglege risikoar, og eventuelle tiltak som planleggast for å utbetre desse sosiale risikofaktorane. Dette gjeld ofte:

- HMS
- Menneskerettar
- Tilsettingstilhøve
- Mangfald og likestilling
- Tiltak av innkjøpspraksis etter aktsemdsvurderingar
- Etikk og integritet

Dei selskapa som har hamna i kategoriane med middels eller høg risiko, er blitt gjort ei nærare vurdering av. Dette gjer ein ved å inngå dialogar for å hente inn dokumentasjon for moglege risikoområde, samt arbeidet selskapa gjer rundt sosial praksis gjennom innkjøpsordningar. Av selskapa vi har gjennomgått, er det 10 selskap vi kjem til å forhøyre oss nærmare om. Desse har faktorar som tilseier ein mogleg høg risiko. Gjennomgangen er i fyrste omgang gjort gjennom spørjeskjema og samtalar. Så langt er det ikkje avdekkja kritiske funn rundt sosial berekraft hjå leverandørane der Steinvik forhandlar fram innkjøpsavtalar.



Desse grafane er fordelinga av risikoen på dei ulike selskapa som vart kartlagde i fase 3. Vidare er grafen : «del av leverandøromsetnaden» ein oversikt over leverandørane i fase 2 og det relative transaksjonsvolumet vårt.



Konklusjon - Tiltak på funn, førebygging og overvaking.

Gjennom aktsemdst vurderingane er ein større del av verdikjeda blitt kartlagt. Hjå Steinvik er det eit klart skilje mellom dei leverandørane Steinvik forhandlar fram avtalar med, og dei som Salmon Group framforhandlar innkjøpsavtalar med. Salmon Group har allereie aktivt kartlagt, stilt krav og forhandla om dei største innsatsfaktorane Steinvik har. Dermed er det naturleg å trekke inn deira utgreiing rundt openheitslova. Denne kan ein finne på deira [nettside](#).

Det kjem fram at den største ibuande risikoen er i produktkategorien fiskefôr. Fôret består av fleire råvarer, inkludert fiskemjøl, fiskeolje, mikroalgar og soya. Soyaproduksjon har historisk ofte vore forbunde med stor belastning på naturressursar, svekka biomangfald, og dårlege arbeidstilhøve hjå bøndene. Transport av soya inneber også store klimautslepp, så lenge det vert brukt fossilt brensel. Produksjon av fiskemjøl er gjerne avhengig av internasjonal fiskeriverksemd, der det ofte er vanskeleg å vite om marint råstoff er innhenta under «IUU fishing» (ulovleg, uregulert, uregistrert fiske) – vilkår. IUU utgjer ein kjend risiko for overbelastning av fiskebestandar, menneskehandel og brot på arbeidsvilkår. Her har Salmon Group i lang tid jobba målretta for å oppnå eit berekraftig fôr gjennom si fôrresept. Dette gjeld både påverking på miljø, klima, menneske og samfunn. Langsiktige kontraktar med seriøse leverandørar, gjev innsikt i deira underleverandørar, som vert følgde opp gjennom revisjonar. Dette arbeidet har redusert den ibuande risikoen knytta til dette produktet.

Steinvik og Salmon Group set i verk tiltak basert på grad av alvor, sannsynlegheit og moglegheit for oppattretting. I tråd med dette har vi etablert ei rutine der vi følgjer opp leverandørane våre basert på deira risikokategori. Sidan Salmon Group har langvarige kontrakttilhøve og fast dialog med våre leverandørar, samt at dei forhandlar på vegne av ei relativ stor gruppe innkjøparar, har dei ei stor påverknadskraft. Og dei kan over lenger tid jobbe med tiltak for å betre tilhøve i leverandørkjeda. Steinvik har mange av dei same styrketilhøva i møte med sine leverandørar. Fleire av Steinvik sine



leverandører er lokalt forankra. Dette gjev oss moglegheit for eit tett samarbeid med hyppig og god kontakt. I Salmon Group sin gjennomgang, har dei motteke informasjon om auka risiko i produksjonen av råvara guar i India. Dette utgjer ein alvorleg risiko, der leverandøren vil jobbe for å hente inn meir informasjon. Dersom dei lukkast i å bekrefte risikoen, vil dei iverksette eigna tiltak.

Totalt sett har Steinvik gjennom aktsemdsvurderingane fått ei større oversikt over moglege risikofaktorar hjå leverandørane. Krava vi stiller i avtalane våre, er også med på å få ned risikoen for brot på menneskerettar og arbeidstakarvilkår i leverandørkjeda. Særskilt gjeld dette fôrleverandørkjeda, som har den høgaste ibuande risikoen.



Dokumentet er styregodkjent av:

Godkjent av styret 21. desember 2023 og er gjeldande for selskapa i Steinvik:

Loke Eigedom AS

Barlindbotn Settefisk AS

Steinvik Fiskefarm AS

Bru Eigedom AS

Steinvik Fiskefarm Visningscenter AS

Brevika Eigedom AS

Steinvik Rensefisk AS

Signert av:



Alf-Helge Aarskog
Styrets leder



Inge Helge Vassbotten
Styremedlem



Alex Vassbotten
Styremedlem



Vidar Vårdal
Styremedlem



Gaute Vassbotten
Styremedlem



Erlend Vassbotten
Dagleg leiar
Steinvik Fiskefarm



Reidar Haugen
Dagleg leiar
Barlindbotn Settefisk

